

धरती मिन्ज “पाप” किय्याँ आया?



आदम ते तिसेरी लाडी, दोई जणे परमात्मा रे बणाएरे बगीचे मिन्ज बडे खूसी खूसी थिये रेय्या करदे। तिन्हा दोनो जणेयाँ ने कपडे नी पाएरे हुन्दे थिये, अपण तिन्हा जो इस गाल्ल री कोई सरम बि नी हुन्दी थी किजोकी, हल्ले ताँई इस धरती पर पाप ही नी थिया। तिन्हा जो ए पता ही नी थिया, कि कपडे हुन्दे कै, ना ता तिन्हा जो अपणे जिस्मां जो ढकणे री कोई जरूरत पौंदी थी। किजोकी पाप नां री कोई चीज ही इस धरती पर नी थी। आदम ते तिसेरी लाडी बगीचे मिन्ज फिरदे रैहन्दे थिये कने परमात्मा कने गाल्ल बात करदे रैहन्दे थिये।



अपण, तिस बगीचे मिन्ज इक उढन्डी कीड़ा बि रहन्दा थिया। से आदम री लाड़ी जो पुछणा लग्गेया, “कै परमात्मा ने तुसां जो इस बगीचे रे बुट्टेयाँ रे फाळ खाणे जो मनाह है कित्तेरा”?



तिसा जवाब दितेया, “परमात्मा ने असां जो सबनी बुट्टेयाँ रे फाळ खाणे जो बोल्लेरा है कि असी जिय्याँ मरजी खाई सकदे, अपण असी सिरफ “खरे बुरे रा पता” लुआणे वाळे बुट्टे रे फाळ जो नी खाई सकदे”। परमात्मा ने असां जो बोल्लेरा है, “कि अगर असी इस बुट्टे रा फाळ खाँगे या इस जो हाथ्थ बि लगाँगे, ता असां ने मरी जाणा”।



ए गाल्ल सुणी करी से उढन्डी कीड़ा तिसा जो बोलणा लग्गेया, “ए गाल्ल सच्ची नी है! तुसा नी मरणा है। अपण, परमात्मा जो ए गाल्ल पता है, कि अगर तुसी इस बुट्टे रा फाळ खाई लिन्गे, ता तुसां जो बि परमात्मा साँई खरे बुरे रा ज्ञान होई जाणा ते तुसां ने परमात्मा साँई होई जाणा”।



आदम री लाडी ने दिख्खेया कि से फाळ ता दिखणे जो बडा भरी छैळ ते सुआद है लग्गेया करदा। से बि परमात्मा साँई ज्ञानी बनणा चाहन्दी थी। इधेरे ताँई तिन्ने तिस बुट्टे का थोडे जणे फाळ खुन्डी करी खाई ले। होर ता होर, तिन्ने से फाळ अपणे लाड़े जो बि खुआए, ते से बि खाई गया।



तिस्सी बेल्ले, तिन्हेरी हाखियाँ खुल्ली गईयाँ, ते तिन्हा जो ऐहसास होया कि, असी ता नन्गे हिन। फिरी से अपु जो पत्तेयाँ कने लगी पे ढकणा।



फिरी आदम ते तिसेरी लाडी ने परमात्मा री अवाज सुणी, कि से बगचे मिन्ज घूमणा आईं गे। से दोई जणे परमात्मा का छुप्पी गे। तां परमात्मा ने आदम जो हाक्क मारी, “तु कुते है”? आदम ने जवाब दितेया, “में तुम्हारी बगीचे मिन्ज चलणे री अवाज सुणी करी इरी गया, किजोकी में नन्गा है। इधेरे ताँई में छुप्पी गेरा है”।



तां परमात्मा ने पुछ्छेया, “तुसां जो कुन्ने बोल्लेया कि तुसी नन्गे हिन? कुदखी तुसां ने से फाळ ता नी खाई लेया, जेड़ा में तुसां जो खाणे जो मन्हा कित्तेरा थिया”? ता आदम ने जवाब दित्तेया, “तुसां ने जे जनानी मिन्जो दित्तेरी है, तिन्ने ही मिन्जो ए फाळ खाणे जो दिता”। फिरी परमात्मा ने जनानी का पुछ्छेया, “तैं इदेया काम्म किजो कित्ता”? जनानी ने जवाब दित्तेया, “इस उढन्डी कीड़े ने मिन्जो ठगगेया”।



--

परमात्मा ने तिस कीड़े जो बोल्लेया, “तू श्रापित होई गया! तैं अपने पेट्टे रे भारे रेंगया करणा ते मिट्टी जो खाया करणा। तैं जनानीयाँ जो, ते तिन्हा ने तिज्जो, सुखया नी करणा, कने तेरे निके निके ते जनानियाँ रे निके निकेयाँ ने बि इक दूरे जो सुखाया नी करणा। जनानी ने तेरी मुंडी जो अपनी अड्डी कने परेची रखेया करणा, ते तैं तिसेरी अड्डी पर डस्सेया करणा”।



परमात्मा ने फिरी जनानी जो बोल्लेया, “जिस बेल्ले तैं कोई उलाद पैदा करणा लगणा, ता तिस बेल्ले, में तेरी पीड़ाँ जो बड़ा बधाई देया करणा। तिज्जो सारी उमर अपने लाड़े रा ही चा (Desire) लगी रहणा, ते कने तिन्ने तेरे पर राज करेया करणा”।



परमात्मा ने आदम जो बोल्लेया, “तैं अपनी लाड़ी री गाल्ल ता मन्नी लेई, अपण मेरे हुकुम जो नी मन्नेया। इधेरे ताँई, ए धरती, जिसेरी मिट्टी कने में तिज्जो बनाया थिया, ए बि श्रापित होई गेई, ते तिज्जो अवे रोटी खाणे ताँई इस धरती पर बड़ी मैह्त करणा पेया करणी। फिरी जिस बेल्ले तैं मरि जाणा, ता तेरा सरीर फिरी इस ही धरती कने दुबारा मिलि जाणा”। आदम ने अपनी लाड़ी रा नां “हच्चा” रखेरा थिया, जिसेरा मतलब हुन्दा, “जिन्दगी” (Life), किजोकी इस जनानी ने ही सबनी लोकां री माँ बनणा थिया। ते परमात्मा ने आदम कने हच्चा जो जानवरां री खाल कने कपड़े बनाई करी लुआई दिते।



तां परमात्मा ने बोल्लेया, “अवे मणू जो असां साँई खरे ते बुरे रा ज्ञान होई गेरा है, अगर तिन्हा ने “नी मरणे वाळे बुट्टे” रा फाळ खाई लितेया ता, तिन्हा ने कदी बि नी मरणा। इधरे ताँई परमात्मा ने आदम कने हव्वा जो बगीचे का बाह्न भेजी दितेया। परमात्मा ने बड्डे बड्डे ते ताकतवर फरिशतेयाँ जो “नी मरणे वाळे बुट्टे” री रखवाली करणे ताँई लाई दितेया।

ए धरती रा पैल्ला पाप थिया, जिस मिन्ज इक मणू ने परम पबितर ते महान परमात्मा रा हुकुम नी मन्नेया, ते अपणी लाडी री गल्लां मिन्ज आई करी से फाळ खाई लेया, जे परमात्मा ने तिन्हा जो खाणे ताँई ठाक्केरा थिया।